

光緒鎮海縣志

鎮海縣志卷二十一

人物傳二

明一

樂良字仲木

案明史樂作季本

祖大原好義遇凶歲有持書易米

者輒應之遂積至數千卷曰吾子孫必有能讀之者及良

生果能讀其祖所藏書六經子史百家之言靡不淹貫尤

明春秋

案史樂趙搗謙以良明春秋與為友

屬文數千言立就師事程端禮

案黃潛撰程端禮墓志端禮病劇日已瞑頭微偏門人樂良進曰先生頭容稍偏矣復張目端坐而逝

端禮

嘗事史蒙卿蒙卿師陽

案舊志作楊誤

岳陽枋二陽師蜀人晏淵

而淵實朱子之高弟也良既學有淵源一以朱子為宗識

明而行果銳志於聖賢不以得失動其心端禮呼為老友

元至正閒以賢良徵至京師與黃潛王禕揭傒斯遊禕少  
良七年恆以兄禮事之講明道術相得歡甚既而良見元  
政不綱歸隱於大浹小浹之閒築室數楹偕從弟平江學  
正衍永嘉承復讀書其中以山水自娛洪武初辟爲邑教  
諭以學行表帥後進循循善誘課試有方一時英俊若張  
信陳韶輩咸出其門時方繕修城池勅立公宇崇秩祀事  
凡碑碣銘記文多出良之手良有文集數卷燬於火無存

子枏見孝義傳

王忠文集參嘉靖府志乾隆志

項信祿字龍山其先溫州平陽人元至正閒諸生師事金  
華許謙爲學以主敬窮理爲本避亂居慶元路與樂良諸  
人相往還洪武二十七年穿山所城成信祿愛其山水遂

家焉性好施與鄰里有貧乏者每給以食死則爲之棺殮  
嘗訓其子曰爲人之道惟忠與孝樹立門戶在讀與耕濟  
以勤儉莫倣驕倣匪僻汝曹當識吾言年八十六卒

宋訪冊

陳韶受業樂良精於詩經中洪武四年進士授汝甯府西  
平縣丞遷知閩之古田清約自守推所學以誨人諸生受  
業者甚眾

洪武登科錄  
參古田縣志

吳士英洪武三年舉人授慶陽府通判以文學飭吏治且  
能遇事不避改造學宮官廨又作詠歸亭景范堂

陝西通志

任存敬敦厚慈實士也自幼有志於學肄業慈谿杜洲書  
院從訓導孫元蒙遊授朱子詩經傳學成而歸耕田讀書  
日與古人晤對洪武初以博學薦入京師試藝中選官高

郵州倅

榮陽外史

趙行遠家邑之慈峯去城四十里少失怙伶仃孤苦有母年八十餘行遠耕田讀書暇則取海錯以給奉養洪武六年以秀才徵至京師試藝中選朝廷嘉之授崇信縣主簿有能聲三載考滿大吏列之異等入覲宴南宮受上寵賚俾復原職行遠自念親老謁告歸省母彩衣登堂捧觴上壽鄉黨見者咸嘖嘖以爲榮焉

本榮陽外史

案陳志彙引續人鏡陽秋有王敏傳云洪武時爲監察御史今考方正學文集王敏乃台之臨海人續人鏡陽秋訛臨海爲定海而陳志彙復誤引之也故刪去之

張信字誠甫弱冠補諸生受業樂良博極羣書尤精詩書  
二經貢禮部卒業太學尋中洪武二十六年應天解元明  
年成進士第一入翰林爲修撰嘗奉命陪朝鮮使臣權近  
遊來賓重譯鳴鶴醉仙諸樓飲宴賦詩歷三載陞侍講上  
諭之曰官翰林者雖以論思爲職然既列近侍旦夕在朕  
左右凡國家政治得失生民利病當知無不言昔唐李絳  
陸贄崔羣在翰林皆能進言讜論裨益當時顯聞後世汝  
等當以古人自期信與侍讀戴德彝皆稽首謝益用感奮  
拾遺補闕以直聲振於朝三十年會試上命學士劉三吾  
主試所取盡浙閩人中原西北無一預者謗聲騰起上怒  
命儒臣覆試之信與同官六七人受命閱卷或曰宜少貶

以承上意信不可仍以三吾所中試卷奏上益怒謂此屬  
皆胡藍黨三吾坐謫戍信等棄市

成化志參  
明詩綜

案曰成化志張信昌國狀元橋人然考明洪武二  
十六年登科錄張信浙江甯波府定海縣人以昌  
國是時尙屬於定海也又攷信傳臚及第紀恩詩  
有鴻臚欣唱首蛟水見文淵句蛟水亦指定海而  
言故舊志入之

豐寅初本名初字復初號復齋宋尙書稷之後世居鄞祖  
茂四徙居定海寅初充洪武二十七年歲貢授訓導陞九  
江德化教諭博學篤行以身迪人正統閒卒年百五歲贈  
徵仕郎兵科右給事妻滕氏亦百餘歲子慶別有傳

嘉靖  
府志

參酌境  
亭外集

案曰嘉靖府志言寅初洪武十七年徵爲國子司  
業後上書諫觀燈謫德化縣學教諭建文壬午棄  
官躬耕聞李曹三志及兩浙名賢錄皆襲其說攷  
全謝山答萬九沙雜問言其子慶以宣德四年用  
父宦籍自江西中式則謂遜國已棄官者妄也又  
攷水東日記亦云慶侍先翁遊宦九江登進士與  
謝山所言用父宦籍中式符而書寅初官則祇云  
洪武中授訓導陞教諭並未言其徵爲司業葉文  
莊與豐慶同官果有司業之徵敘慶先人官必不  
略之而祇言訓導又必不以其謫官爲陞官據是



則不但遜國棄官近乎臆造卽洪武中應徵上書  
兩事亦屬難信故錢竹初撰鄆志刪去之而附註  
以存疑

趙濬恭永樂二年進士知德興縣

案蛟川詩話稱濬恭爲翰林誤

時田疇

多蕪濬恭勸課有方凡閭里有力能兼作者聽一邑遂無

遺利性狷介宦囊寥落卒之日民皆流涕

江西通志

張源字彥本祖子忠見名宦傳源以父早卒不樂仕進自

號廢蓼子才思敏妙博通經史尤邃於易與甬上鄭復言

雍言兄弟講論甚相得工詩文浙東學者爭趨其門同里

張信嘗贈以詩有詩宗追燕國道派衍橫渠之句孫鉞字

敬亭性嗜學探討羣籍工詩兼善畫垂老中副榜作泣玉

賦讀者哀之鐸字時化幼聰穎十歲能文十四補諸生旋

中成化四年副榜卒年僅二十

張懋廷撰傳

韓中字允傳懋和之子氣貌清修循循謹飭讀書工文辭而雅志恬然不慕榮利闢一軒蓄古今圖書宴坐其中披閱不倦客至焚香啜茗取壁上琴作佩蘭雉朝飛等曲心融神會殆不知有俗塵事也

榮陽外史

孫天祥字印旋舉人知太和縣豈弟清廉省刑禁耗盡革無名使費閭里皆歌思之在任六年調廣東之保昌士民走送攀留不絕爲建生祠

太和縣志

梁田玉建文朝仕刑部郎中其時梁氏父子兄弟八人同仕於朝素以忠義相助燕兵入金陵田玉與御史葉希賢

髡髮爲僧及建文帝出亡往來蕭寺田玉時奉衣食後不

知所終松陽王詔贊曰

案忠賢奇祕錄王詔遊治平寺聞藏上嘍嘍有聲異之令人緣藏登

絕頂得書一卷內藏建文時出亡臣僚二十餘人事紙毀

絕字多斷爛銓錄其可識者九人而梁氏與者實四人也

因各以行儒名釋知我其誰至寶淪沒久而同輝

詩系之錄參續藏書

梁良王建文時爲中書舍人燕兵入京良玉訣妻子同朝

臣從地道出變姓名挾微貲踰嶺至海南寓市肆閒以鬻

書爲業尋死焉王詔贊曰忠臣寔寔邇彼海濶耽書翫市

資以盍簪迤如邇如哀此陸沈

奇祕錄

梁良用未詳何官燕兵入京同時朝臣十八人從地道出

良用與焉遂變姓名邇迹爲舟師自沈於水

案續藏書云梁氏父子兄

第為舟師投水死者五人王詔贊曰相彼柏舟載浮載沈中流誓楫懷

我好音昔欠一死非名是尋以完我族庶明我心

奇秘錄

梁中節與同邑郭良

案焦竑忠節錄及世法錄俱指郭良為定海人

俱為中書舍

人少好讀老子太元經燕兵入京偕良棄官為道士入山

以隱

案世法錄郭良梁中節壬午六月皆出亡為道士兩

冠兩人

不識也漏將二鼓微聞兩人泣聲既去畱姓名於

紙君始知之作蕭寺黃冠夜泣詩云戊子春正十三日寺

遇黃冠不相識結蒲拄杖坐西偏低頭不語意自閒亡何

一人復冠簪髮黃面皺多愁顏拊掌遽驚還太息漏分但

聞聲唧唧似懷萬斛愁難傾哀猿夜叫寒鴉泣余腸縈結

詎堪言布衣淫透皆淚痕晨興往探詢其苦兩公忠節雲

無根空餘蟬斷字數個依稀稀恍是亡臣

王詔合贊之曰駕

言導引笑傲林阜頽波莫挽使我心勞

奇秘錄參世法錄

張安國案陳志豪注官工部郎建文五年燕兵迫京師安

國謂妻賈氏曰大事去矣無能爲也余秩卑不能帥師應敵又不能屈膝事人奈何妻曰盍隱諸乃與妻乘舟入太湖聞京師陷安國大慟曰食人之祿而存身於新主之地耻莫大焉遂與其妻繫舟自沈以死

劉玉捐膝錄

縉雲鄭禧嘗

記安國與梁田玉良玉良用郭良諸人死節事而合銘曰今吾古吾知吾者誰潛若漆身希蹤采薇戢戢潛龍寥寥冥鵠豈吝箕疇而甘漢卜山陬水澨天涯海澨會其可逢鼓以南音肯欠一死以明我心白霓晝見虞淵沈沈孰呵護此悠悠古今

乾隆志

案曰乾隆志云梁氏父子兄弟實八人同仕於朝及破京後相率變姓名遯去見於續藏書合之郭

良張安國死節者共有十人爲事之極盛因當時  
法網最嚴人所忌諱故舊志選舉辟薦皆削其名  
里居事迹亦莫徵其實至萬厯開始表揚忠節而  
梁氏止傳四人其得從祀鄉賢者邑人薛三才邵  
輔忠等請之也

樊遠其先臨淮人父連從太祖起兵有功官雲南左衛中  
所千戶遠於洪武二十二年爲溫州衛左所百戶旋調昌  
國衛副千戶遷錦衣衛千戶尋升羽林衛指揮僉事守滄  
州成祖登極授定海衛世襲指揮僉事永樂四年從成國  
公張輔征安南守堡護糧招安難民五年遷磐石衛青門  
水寨把總禦倭於中山界海洋獲船一擒賊十九人明年

調沈家門把總獲倭船三擒賊百四十五人哨至海門洋  
擊沈倭船七擒賊七人斬首九十七級二十一年疾卒遠  
自赴定海衛任遂家焉五世孫懋別有傳

采訪冊

陳端禮字履中志操古雅動不踰規博究羣籍集子弟講  
明經術謂聖賢之學當自修身齊家以達於天下勿事章  
句弟治從子憲相繼爲御史端禮作廉說以規之嘗曰汝  
輩盡忠朝廷不負予教則予得肆情泉石矣乃築室別墅  
遠心著述會郡守鄭珞行鄉飲禮必選郡邑齒德尊者爲  
賓以端禮負介特望詣門迎之次年復以禮延端禮堅卻  
不赴人謂賓主俱賢有裨風教治憲別有傳

成化志

劉德名字世嘉研涉六籍羣史處山海奧僻文不耀世耕

植自給雖至困乏裕如也平居盛服端坐絃琴賦詩以自適後學問難輒竭中以告與同邑高士夏儼陳端禮皆以文行重於時

嘉靖志

陳浩淵一名陳字智甯天性孝友善騎射工詩尤精六書之法築小軒一所匾曰梅月以自況朝夕吟詠其中與鄞楊範王用慈谿劉惹桂宗儒結爲詩社篇章流播價重雞林諸父伯瑞無子浩淵嗣之伯瑞卒哀毀踰禮廬墓三年晚年好施舍修繕途梁以利行者爲時稱重從孫韜別有傳

嘉靖志

王永隆字崇德器度宏雅博學強記永樂九年舉鄉薦第二以屢試國子監高等入銓注出知澤源州

案澤源州當係澤源州之



誤尋改郴州隨俗施教敦博易良不事苛削而綱條井井

不紊治績彰聞丁母憂服闋補宿州地當淮甸要會民繁

政劇承隆敏於幹濟務廣愷弟值旱暵禱雨輒應鄰郡蝗

起不入境臺使者上其事於朝加褒錫九載考滿父老詣

闕請畱降敕優獎進秩右參政視宿如故正統閒案原作

戊戌明史更宗紀正統有戊午壬戌無戊戌當有誤故不繫其年入覲京師乞歸不許又

三載懇疏得致仕擇山水幽勝處築精舍與昆弟親友談

笑其中年七十五卒成化志

陳治端禮弟自幼博覽強識志操高潔不屑凡近登永樂

九年進士授監察御史清介自守執法不阿長院者才之

事有難決必屬於治治殫心訊詢不辭勞勩後陞河南按

察使僉事

案乾隆志作四川按察副使

風節益勵茲邪斂迹不久挂冠

歸里

案乾隆志作人觀卒武昌

家徒四壁立衣食無以自給人服其介

雍正府志

參乾隆志

案分省人物

端禮從子

案陳志案以憲爲治之子又案蛟川詩話

憲能詩有題

永樂十六年進士授監察御史巡按湖廣莊

重知憲體又按江西鋤蕩豪猾肅清風紀糾察郡縣吏之

賢否而去留之不爲權貴少屈南昌之民舊苦三司供給

憲因裁之凡一切宿弊靡不釐革人謂之陳一掃尤善折

獄有婦人其夫被人謀死懇諸官經年未斷憲按其地因

禱於神夢神告曰斗穀三升米便問陳宗禮憲晨起據案

推之見鄰里排年姓名有康七良久曰殺婦之夫者得非

康七乎其人叩頭請罪卒置之法一郡稱爲神明吉安守  
禦千戶臧清貪淫兇惡殺人殆不勝紀都司受賄常曲庇  
之憲至廉清殺一家無罪三人執訊引伏械送京師民舞  
抃於道未幾憲歸會同官以鞠獄出入相訐者引憲初鞠  
爲證俱集刑部憲事已白以待覆奏未出然已有病時施  
禮署尙書寬而無制屬吏肆爲奸弊凡死罪繫獄者悉得  
自便臧清雖罪狀著明尙繫獄未決夜竊至憲所詬罵捶  
擊憲憲忿恨竟卒於刑部於是公論皆咎禮上問侍臣曰  
聞御史陳憲能持身振憲紀今安在侍臣以實對上立命  
磔清於市

成化志參分  
省人物考

韓鼎字廷陳父仕昭貢入太學以歐傷役人充問南京工

部司吏病卒無力歸櫬同伴權瘞江甯隙地鼎年甫弱冠  
痛父客死悲泣二載鬻產備貲奔號千里蹤迹故地以求  
父屍感神夢指示得遺骨歸葬尋中宣德七年解元授句  
容知縣砥礪名節惠養黎元正統十三年也先之變以督  
餉勞瘁死於龍潭驛句容祀之名宦子璉由貢生官至山  
東德州同知孫克濟別有傳

嘉靖志

貝琳字宗器洪武初父以戎籍寓金陵琳幼業儒慕天官  
學遂學象數於司厯何某盡得其祕被薦充天文生正統  
景泰閒從征迤北及兩廣占候有功授欽天監刻漏博士  
天順初天象示警英宗召見便殿奏對稱旨賜白金文綺  
陞五官靈臺郎成化四年因災異上言君能修德感天則

災變爲祥若高宗雖鼎宣王旱魃皆遇災知懼卒成中興之美因條陳弭災圖治六事言多可采六年升監副尋改南京平生精究數學刊校回回歷百中經諸書居家孝友與弟珙南北異地多載及官金陵復治第同居庭生嘉瓜竝蒂士大夫以爲雍睦之報

江甯府志參  
兩浙名賢錄

豐慶字文慶寅初子正統四年進士授兵科給事中丁艱尋遷右給事中與林聰葉盛高棣等諫景帝南城及易儲事言甚剴切繫詔獄景泰四年爲河南參議運艘阻張秋之決慶請自衛輝胙城泊於沙門陸輓三十里入衛州運抵京師命漕運都恭覆報如其策七年英宗復辟陞河南左參政論周府內官不法事上嘉之陞本司右布政使廉

聲大著有縣令以貪墨恐爲慶所按乃爲銀燭裹以蠟因  
掾吏以獻及晚慶視事命取燭不可燃叱使還令詰旦召  
令責讓之其清慎如此會奉表入賀墜馬傷足時年五十  
乞致仕

兩浙名  
賢錄

謝琛字伯玉宋建炎中邑令宇之後穎敏博學爲文雄贍  
正統四年進士知上饒縣蒞政精強操持介特撫善良鋤  
豪猾民稱爲謝城隍繪像以祀丁母憂歸服闋補河南林  
邑去邑治二十里有廢祠址過者輒罹害琛曰神失所依  
乃爲崇問何神曰白牛琛曰白牛豈有神抑伯牛也敗土  
果得碑碣新其祠祀之邑賴以安觀風使者令稽覈錢穀  
磁州倉積弊隱錮琛密廉得其情謂守者曰我已知之其

出者若干侵盜若干存儲若干啟視不爽守吏驚伏遷開  
封通判以父喪去屬州縣賻贈踰二千金固辭不獲行二  
十里封還之制終改福建泉州同知尋擢福建按察使僉  
事未蒞任卒士民哀之子庭蘭諸生象賢克孝紹其家學  
蚤卒人皆惜之琛弟瑛字叔玉平心率物以隱德稱

嘉靖志參

雍正府志

夏時正字季爵先世山慈谿遷定海傳五世至父與誠始  
占仁和籍時正博學強記通經史百家中正統十年進士  
授刑部主事丁外艱景泰初陞郎中時英宗北狩帝廢皇  
太子見深爲沂王立皇子見濟爲皇太子未幾皇太子薨  
時正意在復立沂王一日往謁尙書于謙曰東宮已虛中

外引領望公羽翼舊儲謙曰戎事不修予之罪立儲國之  
大事宰揆與勳舊當任其咎時正起曰恐公無所委其責  
也後謙果以是得禍六年錄囚福建平反死獄六十餘人  
有盜劫藩府邏者迹至閩執其疑似十八人於獄拷掠死  
者半之時正偵得真盜獲龍鳳服爲驗遂抵罪而先繫者  
尙九人破械出之會詔以減死之囚充所在濱海衛軍時  
正慮其入海島爲變轉發之山東然後以聞因言凡福建  
減死囚俱宜戍之北方法司是其言而請治違詔罪特宥  
之時正又言通番及劫盜諸獄以待會讞淹引歲月囚多  
瘐死請令所司斷決詔從之值上杭饑無賴民欲爲變時  
正不待奏亟請發倉賑之人謂有漢汲黯風天順元年擢



大理寺丞久之以便養遷南京大理少卿丁內艱服闋改  
南京太常少卿成化五年遷南京大理寺卿盜殺商人於  
上新河屍浮於江每夜溯潮抵其旅次或疑酒家傭逮繫  
其獄時正至廉得逆旅主人利其財以女誘之私而殺之  
一訊卽服釋酒家傭刑部獄囚有欲亂其子婦強而未成  
者坐死不服時正擬流罪以聞報可時議謂事干倫理十  
惡不可以未成貸死時正復奏言十惡無甚於謀殺祖父  
母父母今律猶以未行已殺爲差內亂固十惡之一其已  
成者婦行已爲所污倫理已爲所瀆故不得已而辟之其  
未成者婦行尙無虧倫理猶未壞故罪止於流不忍加之  
死此聖祖好生之德制律之微意永樂宣德開其未成者

猶多謫戍今安得一切論死乎章下刑部尙書陸瑜覆奏

謂當擬以死罪開其未成取自上裁自是未成者多謫戍

邊時正所建明也七年命巡視江西災傷案楊守陸撰神道碑王鰲撰墓

志皆言七年巡視江西明史彙云五年賑饑民二十三萬

陞大理卿明年春巡視江西年分誤戶汰諸司冗役數萬奏罷不職吏二百餘人遠近悅服長

河洞流民散聚有司不能禁時正親臨其地諭以禍福眾

感泣羅拜時正選其少年開敏者爲學官弟子或補胥吏

一方帖然南昌章江門外每歲夏秋之際水挾風濤嚙城

址欲崩時正召監司發帑修固堞垣增築濱江之地及豐

城諸縣陂岸民賴其利舊例上供之稅石折銀二錢五分

以蘇官田稅重有巡撫某盡歸於仕宦之家時正悉復舊

例又諸王將軍莊田賦與勢家應供之稅多累民代輸時  
正令所司按籍追徵得萬餘石以補貧民逋稅由是豪貴  
皆畏之時正曰吾知爲國爲民耳復疏時弊二十事以聞  
明年吏科因時正上奏不具齋奏人姓名論其簡恣帝宥  
其罪錄彈章示之時正遂以疾乞休歸案乾隆志言時正  
巡行江西墨吏皆  
望風解去而狡黠懷怨者爲蜚語上聞嘗所黜  
非公時正遂自劾請老與神道碑明史彙徵異先是時正  
父嘗寓杭州有田在橫水閒時正因僦室居之屏絕世慮  
足迹不入城市布政使張瓚建西湖書院於孤山以處焉  
案乾隆志作營巢居閣於孤山據成化杭州府志則云林  
處士居有巢居閣明成化十一年浙江布政使甯良右布  
政杜謙杭守陳讓重建於三賢祠右  
偏而延南京大理寺夏時正居焉時正操履端潔不尙  
依違性孝友事親甚嚴敬親歿遇忌日哭必盡哀與兄弟

雍睦終身雅好學工詩文善楷法行書閒居久多所著述  
於稽古禮文事尤詳晚歲自號畱餘道人宏治十二年卒  
年八十八案雍正府志作年九十非也有司以聞上命遣官諭祭營葬  
楊守陞撰神道碑  
參嘉靖志明史彙

### 夏大理籍貫考

夏季爵大理明史彙本傳作仁和人嘉靖府志作慈谿  
人其實大理乃定海人攷楊維立尙書撰大理神道碑  
夏氏其先隴西人唐濟國公魯才者始遷浙之慈谿傳  
二十一世曰千秋者又遷定海傳五世至公之考又占  
籍仁和是居慈谿厯世雖久而誼則疏而遠居定海皆  
高曾祖父之行誼實親而近也至於其父雖寓仁和然

觀大理罷官來杭僦室以居可知先人原無廬舍當時不過客寄他鄉而其占籍買田必在中年以後矧大理

之登第年已三十有五

案神道碑正統乙丑成進士卒於宏治己未歲其登第已三十

五據此以論大理不但生於定海且長於定海也舍生

長之地而反以占籍爲土著可乎雍正府志言大理居

西湖書院然每歲必渡江省故居故居指定海而言若

慈谿則自千秋至大理已七世矣不省高曾祖父所宅

之鄉而省遙遙先冑之居有是理哉且大理晚年歸省

每挾棺以行曰死則葬此以從先壟夫先壟者又必以

祖墓父墓爲重而決非六世以上年遠難稽之冢墓也

府志作慈谿人因大理在杭州未幾書院被火曾歸慈

谿遂謂其先代既久居谿上大理復來流寓非慈人而何而不知神道碑明言又自慈遷定也倘以始祖濟國公爲確據則自正考父奔魯後孔子當稱宋人不得爲魯人矣孔子爲魯人大理之爲定海人無疑然則明史橐何以作仁和人乎曰此史橐之失也卽如賀黃門傳史橐亦云義州衛人乃攷成化二年登科錄賀欽自書浙江甯波府定海縣人遼東廣甯後屯衛官籍而作史者反據官籍以爲義州衛人毋乃愼乎由黃門推之大理其例正同蓋大理及身終係仁和籍定海人至其子乃爲杭人而於慈谿則爲寓賢故詳辨之俟後之修省

志郡志者改正之焉

聽思  
堂集

史敏字德敏定海人由淮安衛籍登正統十年進士歷官河南右參政其岳武穆祠詩有難將片石補天缺空恨浮雲蔽日昏句爲時所稱

明史綜

李綱浙江都指揮李凱子宣德閒凱督征戰歿綱方韶黜母王氏苦節撫之王事詳列女傳正統閒綱襲指揮使由杭州右衛調定海嚴明有勇略視衛篆振舉戎政公宇城隍悉爲葺治性尤孝母疾危篤每夕稽顙北辰求代夢神語治療方遂調劑以進立瘞居常事不白於母不敢行母卒哀毀踰禮喪葬惟謹觀風使者得其實爲請旌於朝焉子濟襲職好文字能繼其家聲元孫誠立別有傳

嘉靖志

丁杰由儒士爲興國縣訓導正統十一年攝龍南學事流

寇粹至杰方率諸生講學賊脅以利刃杰端坐不動曰吾方以聖賢之道教人乃爲汝屈耶賊怒遂殺之

江西通志

艾敬字肅之官衛指揮使沉毅有智蒞政嚴明人不敢干以私正統十四年金華烏龍山賊掠內地猖獗不可支當道廉敬才檄往征討敬挺身深入手射數人矢盡力竭應者不繼遂爲賊所刃總兵徐恭嘉敬勇烈特書忠義以表其門奏聞於朝蒙鏐幣之賜焉裔孫春見孝義傳

嘉靖志

劉洪字文裕景泰五年進士授兵部主事爲人伉直有才積資陞武選郎中劬勞國事諸司推最賜四品俸成化八年原州土達叛奉敕紀功瀕行威甯伯王鉞兵部尙書項忠各以子弟相託欲爲之地洪曰予奪國憲也豈臣子所



敢爲哉益嚴首功斤斤一無所淆將校帖服比旋王項陰

左之止陞俸一級宏治十一年陞廣東左參政尋落職歸

案嘉靖志歸時年四十二但洪中景泰五年進士至宏治十一年已相去四十六年而云歸時年四十二誤甚故削

去日爲詩文自娛有夢軒棄語多警策以洩寫不平暇則

蒔蔬茹荼攻苦如儒生後卜居鄆之月湖與魏傅屠瀟楊

守隨張昂黃隆諸人爲耆舊之集相飲讌唱酬邦人重之

子光進士官知府

董山堂集參嘉靖志甬上耆舊詩傳

賀欽字克恭世家定海父孟員以戎籍隸遼之義州衛

成案

化登科錄賀欽浙江甯波府定海縣人遼東廣甯後屯衛官籍欽少穎敏習舉子業輒鄙

之曰爲學止於是耶取近思錄讀之有省成化二年成進

士授戶科給事中因亢旱上章極諫言此時遊樂是爲樂

憂修德弭災當以實心行實政庶天意可回今朝廷所行未免徒務虛文復以言官曠職召灾自効求退會陳獻章被徵來京師欽聽其論學歎曰至性不顯眞理猶霾世卽用我而我奚以爲用卽日上疏解官去執弟子禮事獻章旣別肖獻章像歸構一室懸之朝夕瞻視其學專讀五經四書小學期於反身實踐終日閉門靜坐主敬以收放心有來學者輒辭之曰己尙未治何以治人旣而從遊者甚衆教以讀白鹿洞規久之磨礱淬厲成其器業如是者十餘年雖不出戶庭而達官貴人聞風仰德者莫不躬拜牀下宏治改元用閣臣薦起爲陝西右參議

案乾隆志作璽廣東參政誤

書至而母適病死

案乾隆志云以母病辭職非也

乃上疏懇辭且陳四事

一資眞儒以講聖學之資謂今日要務莫先經筵宮博訪  
眞儒以資啟沃二薦賢才以輔治道檢討陳獻章天性高  
明學術純正宜以非常之禮起之或任內閣俾參大政或  
在經筵使養君德三遵祖制以處內官內官之職載在祖  
訓不過備灑掃司啟閉而已近如王振曹吉祥汪直等參  
預機要干犯政令非招權納寵叢奸納賂卽邀功啟釁流  
毒邊徼甚至引左道以蕩上心進淫巧以盜府庫此其陷  
君誤國蠹政殃民旣已鑒諸已往尤宜愍之將來內不可  
使職司奏牘預聞政事外不可使鎮守地方掌握兵柄四  
興禮樂以化天下陛下紹基之初舉行朱子喪葬之禮而  
頽敗之俗因仍不改乞申明正禮革去教坊俗樂以廣治

化疏凡萬餘言奏入報聞正德四年太監劉瑾括近東田  
東人震恐思亂義州以守臣貪殘變先發聚眾劫掠顧相  
戒曰毋入東街驚賀黃門欽聞之往諭曰若等吾鄉人也  
今不幸至此良苦然吾竊爲若等憂鎮城兵不卽至耶如  
之何眾初洶洶至是知悔羅拜而泣呼曰吾父也願教之  
欽曰惟不殺人禍可解守臣激變民則無辜能止殺以待  
命尙不失爲良民也良民何畏焉未幾有言鎮城軍果至  
者眾復噪曰賀黃門無嫚語環跪欽里門欽曰吾固知有  
是也城中擾攘至此鎮城焉得不發兵兵雖至爾等不殺  
人必有爾無恐眾散去亂遂定時又有邊將詐誘殺爲陣  
獲者上官按之不得實一見欽卽慚伏地曰他人可欺吾

敢欺賀先生耶其至誠感人如此欽處家篤恩誼正倫理  
厚嫡戚睦宗黨冠婚喪祭一遵古禮不根之言纖毫不入  
於耳子姓必薰陶之以孝弟之義僮僕與人相競者不問  
曲直必撻以訓之日改月化一鄉人皆興於善里俗溺於  
異端喪葬皆作佛事啖酒肉肆爲奢僭欽以身範之晚更  
好易究心象數手不釋卷大臣薦引相屬終不起少嘗隱  
居醫無閭山因以醫閭自號人遂稱爲醫閭先生五年十  
二月卒年七十四諡恭定鄉人祠之凌谿釣臺蓋其講道  
處也子士詒別有傳醫閭集參明史  
蔡明儒學案裔孫某字凌臺亦講  
學醫無閭嘗以古本大學授遺民高笠僧云國朝先正事  
畧案西河  
集高笠僧遺書一帙則古本大學也叩所自來曰吾遺人  
也天啟末全家死於兵遂祝髮竄海濱少受學義州賀陵

臺先生及臺爲賀黃門欽之孫講學賢無間以大學古本  
受予曰古學之失傳由不知本也大學不云竟是皆以修  
身爲本乎本該體用而統心意及國家天下必正心誠意  
而學乃有體必齊家治國平天下而學乃有用北宋祖陳  
博之學講性命而畧事爲則專內遺外不知有身南宋宗  
程頤之學就事物而求心性則登枝逐流并不知有本夫  
格物者絜量本末本諸身也致知者審度先後以身先之  
也中庸以誠意爲誠身孟子以存心爲養其大體是正心  
誠意無非身也大  
可受學心契之

沃類字文淵父浩見孝義傳類卯角時輒博覽強識善屬  
文成化二年成進士官監察御史七年奉檄清理福建戎  
政丁內艱服闋補原官十二年遷按江西發奸摘伏人稱  
神明吉安知府貪黠厲民類首勅之爲權貴人所銜誣以  
庭辱守令讎讐憲典左遷內鄉知縣壤接鄖陽鄖陽豪右  
多侵內鄉地致民失業流移類至繩豪右以法歸侵地數

百頃流亡復還及秋令各輸粟備賑不三年而儲積至十

餘萬石民甚利賴之尤究心學校培植士子遷知荊州

案蛟

川詩話沃侍御知荊州王鉞為詩以規之有今日牧民宜

向備此行聽訟貴從寬句侍御終不能用據是足徵其剛

直出於荆故建王府諸無籍者率冒三衛軍民色盜支月

糧不可窮治狼搜剔虛數奏罷貪吏數人削除附冒之糧

數十萬石以備兵餉宏治三年丁外艱歸尚書余子俊李

敏交章薦其才頻不欲再仕退老於家日惟屬詠自適非

公事不迹城府

案詩話沃侍御晚年里居猶指摘大臣過失許奏坐戍榆林久之有還此事舊志不

載故附注之以見其卒年七十九

雍正子汝賢字廷用太

學生灤州判官

家傳從曾孫光前字道孝言行質樸萬曆二

十八年舉人官知縣

文介集

朱炯字德蘊成化二年監貢授長沙府經歷稱職巡按獎  
其能歷署湘陰安化湘潭益陽諸縣所在著廉聲皆報最  
陞貴州施秉知縣以年老告休及歸自號宜休居士同郡  
吏部尚書屠浦贈以詩有德蘊先生不受財之句

嘉靖志

周天民字志尹成化四年舉人初任閩縣閩居省會供億  
繁劇天民具詳當事一切與鄰邑均之報可民感其德立  
祠以祀在任九年遷易州知州治內發地得古埋錢十餘  
萬盡輸之公藏修雉堞建官廨及賑濟窮民尋致仕家居  
三十餘年卒年九十三室無餘物有書數百卷而已

嘉靖志

王愷字宗元少孤力學成化七年舉人授薊州學正薊人  
簡樸鮮文愷教以浙中文獻捐俸以贍諸生之貧者多所



造就先後登科第爲名卿嘗爲山西同考官遷平原知縣有陷以重貨者愷峻卻之遇旱禱雨輒應俗多盜有麥商夜經村寺被劫陳於縣愷故匿其事陰令販豆者和少熟豆其夜過寺復劫去令捕兵易服就寺僧貨豆中有熟者遂收捕一訊而服自是盜賊屏迹稱爲神明後權要以非法相強愷曰令可去國法不可撓遂致仕家居三十餘年號樂休居士

嘉靖志

陳韜字德玉浩淵從孫自幼聰明潛心經史雖盛暑必衣冠以居與人交謙厚和易尤善事母母疾衣不解帶旣卒廬墓三年致雉鹿芝草之瑞縣令錢如京聞而異之特式其廬宏治十七年以貢授厯城訓導飭禮度講經義嚴課

諸生以身先之歲時餽遺俱辭不受巡撫史琳檄韜署縣  
事韜固辭曰官以職敎而出理民事豈尸祝不越樽俎之  
謂乎琳大器之陞益都敎諭聞命卽乞休比歸躬田園甘  
清苦布衣疏食晏如也

嘉靖志

賀士諂字訪之欽之子天性穎敏博極羣書能傳父學陳  
獻章一見稱之曰老眼識鳳雛中宏治五年舉人淡於名  
利後以都御史張文錦薦被召首陳十二事曰法帝王務  
實學存敬慎謹細微親賢遠邪崇儉愛民正俗樂諫惜才  
保終不報辭疾歸終其身不仕

明史參  
乾隆志

劉鼎字伯銘定海衛指揮僉事性質沈毅狀貌雄偉識韜  
略書史蒞衛政擢把總備倭威著能聲正德初江西桃源

寇起督勦大臣檄鼎爲偏帥鼎奉檄卽坐廳事中呼家人  
曰謹守室廬時有牽裾者引佩刀裁之曰今日受命卽捐  
身報國時也出門簡徒而行竟奏捷陞浙江都指揮僉事  
時逆瑾竊柄繼以宸濠陰謀不軌內使充斥道塗願使武  
弁若奴隸奸豎在浙者蓄兵爲宸濠應援鼎密與臺司協  
謀擒之鼎居寮案中恂恂無所言事至徐出一二語眾皆  
稱當有好爲伺察者鼎云水至清則無魚人至察則無徒  
聞者悚惕嘉靖初署總督備倭年且七十躬行邊簡閱徒  
旅謂其屬曰祖宗爲慮深遠立法周至吾輩恪守之而已  
尋致仕家居任邊計者多所諮訪年近八十而終

唐志

俞憲甫字士欽別字東川曾祖敏德見平義傳憲甫正德

三年以貢士

案乾隆志作例貢

入太學授長洲丞督逋稅催征有

敘雖頑民皆畏服樂輸委訊訟牘能以理開諭兩造輒自獻其誠不敢終訟值歲饑戶口逃徙委曲撫綏緩賦急散民忘困而感德嘉靖改元以疾告歸致仕年六十七卒子世才正德十一年順天舉人世中守之由貢生知惠州

河源縣世鑑官州判

長洲縣志參乾隆志

徐潭字惟靜幼穎異及長博學能文登正德三年進士五

年知上海縣

案上海縣志作宏治六年進士正德二年知上海

誤果斷明決人不敢

干以私其俗區長里魁歲有常例輸官潭皆斥不取遇歲

大祲設法賑濟多所全活性惡異端凡僧尼淫祠無名之

祀一切毀罷先是民控於官每苦遺卒逮捕倚勢漁索潭

乃造木人於庭有訟者卽令持至所訴之家抱木人自詣無敢後者宿害遂除邑之豪族率逋官租區長往往破家以償潭嚴懲之以此植怨會督儲者有所求不與乃遂以事中傷改知湘潭釐巡司權稅之弊懲藩府校卒之橫境內肅然已而遷崖州知府恩威懋著生熟峒黎咸服從其教令擢山西僉事

案雍正府志作山東

以勞瘁邁疾未赴任卒

乾隆志

邱某一生恂恂下人有犯不校稱書必有忍其乃有濟之言以訓俗故人呼爲千忍翁善風鑑有女慧而貞鍾愛之每擇壻無當意者偶遊慈谿過書塾得張楷試以梅竹詩大奇之卽許以女焉後果大顯其識超卓又如此

嘉靖志

朱鉞字廷威正德二年監貢授海豐知縣有治行嘉靖五

年入覲敕諭之曰茲土比歲災異迭見水旱頻仍饑饉流離盜賊竊發閭閻愁苦教化不行是豈無自而然哉聞爾救荒多術民懷爾德俾爾復還舊職勉副朕意慰安民心其褒嘉之如此第鐸字廷振三年監貢授儀真縣丞佐令

協治聲著鄰封

乾隆志

周鐸字體乾學問淹博工文章正德末歲貢授延平訓導迪士有方人文蔚起卒於官族子栗字用直嘉靖十四年選貢任潛山訓導以艱歸服闋補莆田陞清流教諭後爲唐府教授王甚重之戶部郎中龍津贈以詩有君才齊賈傅王德進長沙之句云

乾隆志

韓克濟字用之鼎之孫弱冠補諸生貢入太學嘉靖元年

中順天舉人授六安知州搜剔積弊招集逋亡三載課績  
稱最遷鎮江同知政治如前擢鎮遠知府興學校變夷俗  
士民翕然嚮風諄乞休歸克濟生平博徵古典與人接語  
若懸河懇懇於經世之務自歸田里日以詩文自娛十餘  
年而卒

嘉靖志

樂舜賓字宗堯號吾江嘉靖三十八年進士知新淦縣多  
異政其鉅者流寇數千人薄城民倉皇無措舜賓率眾擐  
甲登陴峻防飭備以藥弩殲其渠賊皆駭去逾年城圯於  
水伏寇耿耿思修宿怨舜賓靜以鎮之拮据版築百雉屹  
然邑恃以無恐已遷工部主事董陵役椎清源巡河務所  
至以廉幹著出守惠州清郵剔蠹均徭撫疲民多頌之巨

寇竊羅浮山時出剽劫無宿宇舜賓單騎往諭禍福洞賊  
悉泥首聽命一二梗化者奉詔討除之在惠數十年境內  
不復苦盜解組歸宦橐蕭然

乾隆志

薛俊字文祥一字梓山父通見孝義傳俊自少刻意學問  
經史百家靡不博綜正德末縣令鄭餘慶延修邑志自宋  
元以來事皆繫於郡乘至是始有專書嘉靖初由貢入京  
禮部試廷試皆第一授常州府訓導以文行董率諸生譽  
望蔚然陞浮梁教諭遭倭亂不赴時總制胡宗憲開府海  
上俊獻議曰水戰東南長技也故國制瀕海衛所俱置官  
哨船以備倭但虛飾美觀少遇風猛不便行駛近年探報  
聲息多賴民船莫若更無益虛竄之制務求堅固便實用



每官哨船增置小划船或三或四有事則與大船夾戰無事則樵山漁海以贍器械修補之費宗憲頗采其說俊又著有日本考略都督萬表載其書於經濟文錄中卒年七十一從子一乾諸生營於嘉靖季年佐張時徹修邑志俊

孫二雄字廣林官京營守備

薛一桂撰傳參籌海圖編雍正府志

薛一相字萬石與兄一卿甚友愛性嗜學室火不持他物第負書笈出家人諄爲迂徐答曰書在吾何憂無廬嘗爲里中亡賴所搆訟於郡守一相士書自理凡數萬言皆援據經史故實守驚曰灝海乃有此博學雋才不韜而直其事爲諸生有聲時學者狃於舉業束書不觀一相獨博覽羣籍治古文辭以起衰式靡自任歲試第一其次則劉時

益卽一相所受經師也一相欲讓之學使不可後當貢竟  
讓時益人高其誼卒年三十四以孫三才三省貴贈一相  
一卿各如其官子邕見孝義傳文介集參  
乾隆志

薛一本字萬殊酷好詩書爲粵西藩司照磨布政使譚某  
器重之有事輒以相詢遷粵東肇慶衛經歷所在以廉吏  
稱乞休歸里名德爲里黨所尊卒年八十九子二龍字雲  
麓少隨父任嘗入蠻酋家以貌類其子畱之宿夜使侍姬  
授枕二龍佯醉唾吐姬不得近長而喜振人急鬻產得贏  
金值其友韓某娶妻乏貲卽以助之人高其誼孫玉衡別  
有傳文介集參  
天愚集

賀琦字廷玉諸生好義以靈巖石方喫頽圯久民困日滋

乃捐貲白縣令鄭餘慶爲倡庀工伐石殫力修築蓄洩有時而靈巖一鄉斥澗可田者計四百餘頃溉及鄰壤者無慮百餘頃御史孫漳爲之記已而入太學授選化丞丞故專司馬政郡守饋遺有常額琦一切卻之縣故有倒馬五百匹馬戶計賄其承則虛文以蔽上官琦獨清查比法追償需用營署令事省汰冗費不煩里中供億俸資之外囊無私入旣以病謝歸與弟璘相友愛璘以琦年老求析產則盡以腴田授璘而自取其瘠者冬月見海樵十餘輩溺水得出幾不能生琦衣以緼袍哺以粥糜乃俱得甦鄰人有死不能棺葬者出資贍之人咸服其高誼

乾隆志

丁瑞春字甫田年十四爲諸生博聞強記史傳諸子百家

及天文地理無不涉覽融貫逾冠魁隆慶四年鄉薦赴會  
試同考官已薦其文值主試素有隙謂其年尙少故黜之  
遂鬱鬱而卒姪汝才汝光汝斗刊其文集三十卷惜煨於  
兵燹

乾隆志

劉隆字大昌定海衛指揮使以強幹稱屢協總諸衛備倭  
時海上寇起許二陳思盼最盛隆與諸衛謀平之後賊入  
康頭隆提師薄之而舟忽膠隆股

案乾隆志  
股作腹

中流矢見血

益奮怒鏖戰揮諸舟競進卒破賊俘四十餘人斬首三百

級

案乾隆志  
作百餘級

嘉靖三十一年

案乾隆志作嘉靖壬午  
國編作嘉靖壬子攷明史世

宗紀壬午乃嘉靖元年壬子乃三十一年分相隔頗遠  
觀下三十四年戰歿則隆遷把總當在三十一  
年故改正  
之遷把總嘉興統舟師備乍浦當松江七團賊歸隆阨之

焚沉賊舟俘斬幾三百級

案乾隆志作二百級

旋會破史家浜賊隆

又扼之沉賊舟激浦外洋一日追賊向暮黃霧四塞以孤

舟在賊圍中逮曉從兵皆懼隆大喊作氣手發一地雷衝

沉十數舟俘斬二百餘級陞署都指揮僉事守備溫處三

十四年四月倭寇薄瑞安縣隆整兵遽出欲折其鋒偏將

尹千戶請旋師避之不聽往殺賊十餘人賊遁去迴軍至

田閒有數賊伏莽中遽起擊隆隆不及應遂與尹千戶死

事聞贈隆都指揮僉事仍與世襲命有司立祠祀之

鎮海縣志

案曰籌海圖編殉節攷大書嘉靖三十四年四月

賊犯瑞安守備劉隆千戶尹某等死之且爲之傳

而是年閏十一月又書守備劉隆千戶劉綱百戶

張澄與賊戰於瑞安三港死之官同地同姓氏及  
殉難之年皆同而月與從死之神將不同豈當時  
有兩劉隆歟然攷圖編倭變紀嘉靖三十四年四  
月竝不書賊犯溫州惟於十二月書犯平陽三港  
守備劉隆死之十二月與閏十一月當係刊本偶  
誤平陽瑞安地亦相近是殉節攷閏十一月殉難  
之劉隆卽倭變記十二月殉難之劉隆也設果有  
兩劉隆則其年四月殉難瑞安之劉隆倭變記斷  
無不書之例則劉隆又當是一人也故識之以存  
疑

樊懋遠之後嘉靖十七年襲定海衛指揮僉事有幹才三

十一年掌鄆衛所印六月二十日倭寇薄城下懋與守禦  
指揮魏英登陴合謀攻賊賊乘夜半雷雨入城懋督兵  
力戰於大堡塘上死之年五十二英復率所部巷戰至天  
明賊從北門遁大吏以懋死聞於朝贈指揮同知海國編懋  
四世孫維屏字時翊崇禎六年襲職狀貌秀偉工書能文  
爲時所稱年二十九卒

宋訪冊

陳京字兆先其七世祖陸定遠人洪武間以父仲和功襲  
正千戶建文朝與燕兵戰中流矢卒成祖既立削其爵籍  
旋授睦子鑑定海衛百戶俾世襲遂家焉京襲職百戶精  
於韜略射藝絕人爲上官推重時倭夷蹂躪浙閩諸省朝  
議衛官軍士不足以制寇添設總兵五營將校開府定關

統轄浙直兩省都督俞大猷知京材加以滬泥一作甬千

總督理戰艦查巡南北兩洋京無不周厯一日颶風大作

飄溺民船京懸賞命軍士撈救全活二百餘人案家傳京

日汝有陰德當錫汝嘉靖三十一年倭踞烈港京與其子

鳳鳴從大猷用火攻破之毀其巢穴倭人驚逃擒斬無算

未幾又破之於洛迦昌國等處從此賊艘不敢竄入浙洋

寇禍漸息父子之蹟居多京以功名終鳳鳴別有傳乾隆志參

蛟川  
文獻

李興字秋崖指揮震之子慷慨挾奇節嘉靖間倭寇擾海

上營帥師防禦定海臨觀昌國三衛要害有勞績亡何誤

中軍興法罷官居常鬱鬱遂縱情於詩酒以天年終有遺



葉藏於家子環別有傳季子珮萬厯元年與環同中武舉

孫一登爲武學生好劍術

文集

艾升世襲定海衛指揮爲將多沈計務自下善馭士卒時以術操縱之嘉靖閒官備倭把總嘗敗賊於長白港斬首六十二級又擊沈賊船二隻於劍山洋累陞參將萬厯元年擢昌國參將明年又戰於浪岡山擒賊十八人斬首二十九級救被擄民四十九人一時與指揮李誠立並稱海上名將尋爲人所構論遣戍二十三年卒於戍所同里薛三省甚悼之謂其功業不竟所志云

文集參  
唐志彙

李誠立字元德綱元孫父釜字寶山官備倭浙江都指揮有威名誠立年十六襲職卽以材視衛篆值倭夷跳梁督

府鎮海上徵兵四集檄下諸指揮構頓舍各三百誠立獨  
一日辦督府以是數稱其材可任將兵而誠立負氣不爲  
縉紳所喜居八年始遷松海備倭把總行都指揮事馭士  
以律臨敵能驅使先登身亦自冒矢石大帥戚繼光每推  
爲敢戰以功陞湖廣行都司署都指揮僉事尋罷歸衛旣  
而備倭定海陞福建行都司轉廣東遊擊將軍山賊蘇繼  
相等鈔掠長樂縣界數撫數叛督撫議集兵勦之誠立謂  
粵兵數中寇猶驚弓之鳥非翼以浙兵不能勝乃募兵東  
陽義烏閒厚其餉不私一錢又與士卒同甘苦故行法果  
而不怨能得其死力長樂盜平論功陞廉瓊參將督府與  
御史臺計以繼相雖翦其黨藍一清賴元爵尙在疏改誠

立潮州參將令統所募兵合海豐揭陽歸善永安諸軍剋  
日竝進誠立獨首破葫蘆等數十餘寨擒斬三千四百有  
奇捷聞賜金幣陞副總兵協守漳州會餘孽林道乾等復  
逋爲海寇誠立數以兵蹙之道乾遁走餘黨悉就擒縛已  
而賊諸良保嘯聚山谷聞誠立引兵三千人直抵其巢覘  
知軍後無繼併眾殊死禦官兵遂失利案乾隆志言林道  
乾等亂誠立孤軍  
抵其巢賊死戰遂敗積是以誠立奪職復詣軍門請更前  
諸良保事繫於林道乾誤已死戰竟奮勇斬賊首七百五十餘級督府疏言誠立功罪  
相半乞復原官而巡按某齟齬之論戍密雲適繼光鎮其  
地見誠立至迎勞極生平驩時方用南兵禦虜遂命誠立  
回南募兵取道過家終以夙憤瘍發於頤卒年四十二案  
乾

隆志作四十八誤誠立虎鎮隼目髯如虬結僑勇自負嘉靖閒稱

名將居家情大誼尤厚於收族云子廣平字雲蛟魁梧有

父風官臨觀把總

薛三省撰墓志

陳鳳鳴字離峭

案家傳作離岡

號龍川京之子勇敢善射兼饒智

略倭夷變起從父破賊於洛迦山都督俞大猷奇其材任

以巡洋遊擊銜嘗獻禦倭機宜策於大猷曰防海之制謂

之海防則必宜防之於海猶江防者必防之於江禦倭寇

不外是矣夫倭夷遠隔大海依山島爲家其內犯中國也

沿海自嶺南以迄遼左延袤一萬三千餘里在在可入然

自五島開船必由陳錢下八山經過取水候風始分投登

犯若南風急則出茶山而往登萊二州并天津到茶山而

風轉東由高家嘴而入吳松風轉西則過老鶴嘴而入三沙此陳錢向正北之程也若東南風急則由下八山頂羊嶼越馬蹟而進羊山到羊山而風轉正南則由大小七北經翁家港劉河而入青州南風轉正東則由許山而入金山乍浦此陳錢向西北之程也若東北風急則過七星頭而入深山蒲舉到蒲舉而風轉正東則入大衛沙頭舉而進長塗到長塗而風北案一作東北則由兩頭洞而入定海到長塗而風轉正南則由勝山而入臨觀到臨觀而南風大作則過瀝海而達海鹽澈浦此陳錢向正西之程也到蒲舉而風轉北案一作東北則過三星鼠狼湖一帶而入舟山矣若正北風急則漂外洋渚山而達閩廣矣大抵倭舶之來

恆在清明後或重陽後春初風候不常過三月風來自南  
倭行船不利過十月風來自西北亦不利故防汎以三四  
五月爲大汎九十月爲小汎皆因防倭而設浙海南接閩  
洋北聯吳會故會哨兩界互爲聲援海防之所以固也制  
當以每值春汎戰船出海初哨當以三月二哨當以四月  
三哨當以五月至十月小陽汎亦慎防之其南哨也至鎮  
下門南麂王環島沙門籌山交於閩海而止其北哨也至  
洋山馬蹟灘澚衢山等處交於蘇海而止陳錢爲浙江分  
鯨之處則交相會哨夫江南之掙扼在崇明浙東掙扼在  
舟山蓋崇明諸沙者三吳之屏捍也舟山諸山者兩浙之  
屏捍也陳錢今中國海山之盡處也故賊犯北洋經茶山

蛇山犯吳松者必藉崇明等兵船以禦之由東海經陳錢  
馬蹟犯定海者必藉衢山馬墓兵船以禦之由南洋經韭  
山烏沙門犯昌國臨觀者必藉舟山烈港兵船以禦之要  
之防海有三策出海會哨毋使入港者得上策循塘距守  
毋使登岸者得中策出水列陣毋使近城者得下策不得  
已而守城則無策矣大猷視其條陳擊節稱賞上諸總制  
胡宗憲宗憲曰熟悉海洋形勝備詳倭奴蹤迹有此幹濟  
當急用之遂以南洋任其巡哨北洋雖非專轄亦須其肇  
畫鳳鳴經略海上凡十餘年後退歸家居卒年七十四撫

二弟極友愛

乾隆志參  
蛟川備志

劉夢祥定海衛人官百戶嘉靖三十四年四月內奉檄領

兵船出海遇倭寇犯崇邱夢祥卽部兵登陸與賊戰奮勇衝鋒獲賊首數級力乏寡援遂死賊刃當道憫其烈立祠

祀之

籌海圖編

邢國泰舟山所百戶當倭薄城時不避艱險親冒矢石眾寡不敵而死參將戚繼光憫其忠烈設主於敵樓祭之妻李氏撫遺孤繼勳截髮矢志躬紡績以給口食繼勳長襲職痛父死敵母嫠守奉事極誠敬邢氏一門父以忠死母以節子以孝聞都督盧鏜奏於朝旌表之

唐志案

陳表昌國衛所

案乾隆志作舟山衛所

百戶嘉靖三十二年四月倭

寇入城表曰吾力無如之何有死而已但置所署印何地

遂送母出城納印於千戶金鏊追賊奮鬪而死

籌海圖編



丁曉號仰山幼習舉子業兼工詩文以試不利輸粟爲崇  
明丞斬倭寇清沙塗修學宮名膺卓薦以親老告歸甬東  
浮橋各邑派費曉慨然捐金數千獨造一次餘貲修百丈  
街斗門橋遠近頌之

唐志  
案

戎良翰增廣生資性峻介義不苟合素以忠孝自許嘉靖  
三十五年倭寇內掠遂陷慈谿良翰家靈緒聯慈壤甚邇  
乃倡議集兵僅得百餘人

案乾隆志作  
十餘人誤

與賊格殺斬首二

級賊披靡而去已又遇賊於邱洋良翰奮勇力戰賊方蟻

聚遂不能支爲流矢所中死監司爲之禮葬表其門

壽海  
圖編

姚思敬任俠尙義鄉黨相競有不直者輒正辭色分決之  
人亦帖服嘉靖三十五年倭寇據邵輿思敬倡率丁壯數

十百人應募殺賊明日赴賊所俟其出掠遂挺戈迎敵獨殺數賊賊更迭出奇擾之眾人皆潰思敬力竭遇害令宋繼祖給貲祭葬扁其門曰義勇崇祀忠義孝弟祠

唐志

楊一居金家畧染幘爲業年二十餘膂力絕人嘉靖三十三年夏倭賊數百登舟劫其畧一恚曰忍吾鄉坐罹荼毒乎持長矛倡於眾曰有能殺賊者從我少年從者十餘輩迎戰於海塗手殺數倭賊鳴角聚而扼之諸少年靡潰一獨力戰復刺中二倭一亦被鎗而死賊忿恨解屍屠腸分而懸之鄉人高其義立祠祀焉

唐志

葉七定海衛軍賊汪直負金塘烈港穴爲寇嘉靖三十二年閏三月參將俞大猷提舟師直入其港討擊火礮橫發

勝負未決大猷舟忽挂賊纜檣楫不能施賊眾方逞七徑  
取斧投水斫其纜未及斷賊以鎗刺中七項七呼曰死矣  
吾必斷其纜連揮數人纜斷而死大猷舟遂免後四日官  
軍卒破賊空其穴大猷之再入也有二卒王姓者後期當  
斬因請閒燒賊砦以贖死大猷許之二卒從外海緣山越  
險晝伏宵行四更抵賊砦賊方睡乃卽其處燕火火藥橫  
發羣砦俱焚駭而突走投水死者踵繼舟師乘焰進破之

遂成奪巢之功

籌海圖編

胡滾字克源有勇略倭寇滬州梅家塾邑令宋繼祖

紫乾隆志

職官宋繼祖嘉

第三十五年任募義兵往禦以滾爲長率眾出海時寇立

木柵繞以鹿角四圍皆汚田勢不可破滾奮勇爭先與鬪

所部係烏合之眾見賊皆奔滾獨後殿賊突至乃手刃三人力竭遂爲所害繼祖聞之扼腕曰眞義士也申於督撫旌其門弟沛當滾迫於賊時往救同歿於陣

嘉靖志

陳仲仁諸生幼習韜鈴嘉靖三十一年倭寇定關止半邊山下參將戚繼光遊擊徐景升素與仲仁交知其材武令率前鋒渡江奮擊生擒倭七人并斬級而還中丞嘉其功欲題授武職仲仁辭以母老竟以青衿終其身

唐志

任文華字南城力能舉七百觔嘉靖閒倭寇熾其所據之穴曰戈梅閩廣之師莫能克文華聞之奮然往搗其巢浮沈水寨中三日夜鑿沈賊船不計其計賊多漂沒餘黨散走棲匿山谷盡掩捕之總制胡宗憲授文華官辭不就賚

以金帛亦不受曰王事靡盬臣民分也敢因以爲利乎但願子孫賢達有用於世斯足已宗憲表其閭曰義勇子茂亦以行誼稱孫德敏別有傳

唐志案

邱希賢別號福泉子幼喪父家中落與兄協力振復事母

孝有從弟死家貧窶分產撫其孤嘉靖閒

案原作嘉靖閒已考明史世宗

紀無己巳年分或係乙巳之饑饉頻仍倭寇且猖獗民不

聊生希賢呼閭里子弟謂之曰汪錡一童子尙執干戈以

衛社稷況吾儕俱壯夫不能除寇患恥甚焉適縣有帖傳

軍門令鄉兵勦捕有功同官校一體陞賞希賢益奮率子

弟奪賊舟於本境前後三十餘戰又援慈谿龍山所二處

生擒倭寇七人斬獲倭首三十級解送倭船弓箭刀銃數

百帥府嘉之賚以金辭不受萬厯四年

案原作乙丑歲攷明史神宗紀乃萬

厯四年

海道蔡某給事何某御史韓某竝上其功詔給官帶

仍令督率防守以效忠勉義額旌之

唐志

李唐字中原世爲定海衛千戶唐以諸生不襲職尋中嘉靖十九年副貢倭寇犯蛟關諸指揮使延唐畫策唐言海濱要害處可聯巨筏貫以釘沈水底濠河外掘坑藏火器其上令守埤者皆偃旗息鼓以待旣而倭舟乘風至著於釘猝不可解登岸跣行覺熱氣隆起仰視城上聞不聞聲倭大疑駭遂舍之去總制胡宗憲嘉其材命有司招之出唐曰偶爾言中實諸大夫之力竟辭不往後邑令延爲鄉賓卒年九十五子如珪別有傳

天恩集

李賢字邦臣父某官衛將軍賢弱冠補諸生教授生徒多  
所宏獎尙書薛三才三省皆其門下也郡守周希哲縣令  
何愈辟修郡邑志總纂張時徹極推重之考證多出其手  
尤精六壬之學總兵盧鏜延之幕府時倭夷由定關入犯  
桃花渡郡城書閉賢啟兵道任環開長春門聽民出入眾  
咸德之始賢壯年時其父嘗挈遊天台雁宕及觀龍湫泉  
顧謂賢曰汝業文章當若是變化因自號龍湫居士晚營  
一椽題曰白賁精舍與諸名士論古賦詩竟以此終唐志  
豪  
樂亮山諸生嘉靖四十二年知縣何愈延郡人尙書張時  
徹修邑志亮山偕同邑諸生俞應科江汝柵謝諫薛一乾  
諸人實預其事參綜舊章益以新所建置詮次成編亮山

等功居多云

唐志  
案

彭宗憲舟山人萬厯時以貢授封川知縣有惠政後致仕歸民感其德因其去而立祠每值誕日必歌舞以侑祀崇禎時宗憲尙在年已八十餘云

唐志  
案

案明嘉靖後舟山隸定海故唐磐庵志稿入之又案舊志選舉制貢有彭時憲疑係兄弟也

邵鳳來字廷儀父德爲徐州衛經歷多治行鳳來生而岸異事親極謹里中稱爲純孝隆慶間海嘯潮溢薄城郭巡撫觀察而下議備築北城外塘命縣令擇民之賢者董其工僉曰鳳來可乃營度縷悉大府以爲才旣由吏員授廣東屬州吏目轉惠州府照磨勤職奉公爲地方疏漁利靖



寇患歲荒捐俸賑濟民德之歸里囊橐罄如割所居之廬  
售人適戚族有窮無告者卽以其直賜焉子輔忠司李昆  
陵時迎養屢弗就一日訪舊過之畱未匝月曰奈何以口  
腹溷若遂歸輔忠後官至太子太保兵部尚書鳳來三授  
封誥卒崇祀鄉賢

唐志  
案

鄭鳳字時鳴授萊蕪主簿不取民錢暑月常以草衣爲裹  
而表以公服人曰微官雖廉誰頌爾德鳳曰旣食祿何敢  
貪墨以負朝廷耶署縣事益著清白勞心撫字不妄加鞭  
笞羨餘不入私橐及新令代郡守意其署篆必豐於貲借  
名索之無以應竟罷歸

唐志  
案

徐石蒲佚其名以字行性高曠嘗夜泊京口朗吟一輪明

月天如洗愁人不免中夜起之句時有參戎湯某將任淮  
陽聞歌異之邀至任厚贈以金歸至長江舟覆行李俱溺  
石蒲從水中拍掌笑曰湯裏來水裏去謂贈自湯某而失  
諸水也家居有鄰人侵其蔬畦不之較鄰人自愧遂還其  
侵地生平無他嗜好惟蓄琴一出必自隨園中植菖蒲晨  
夕坐對之臨終命以琴蒲殉著詩頗多皆散軼不傳

唐志  
案